



Meeqqat inuusuttuaqqallu 18-it inorlugit ukiullit ikioroornartumik atuilersimasut katsorsartinnissaannik immikkut ittumik neqeroosinnaanissamik Naalackersuisut UKA 2018-mut pilersaarusiornissaannik Inatsisartuni aalajangiiffigisassatut siunnersuut.

(Inatsisartunut ilaasortaq Bendt B.Kristiansen, Inuit Ataqatigiit)

Inatsisartunut ilaasortap Bendt B.Kristiansenip Inuit Ataqatigiinneersup oqaluserisassamut pingaaruteqarluinnartumut siunnersuuteqarneranut qujalluta, Inuit Ataqatigiinniit ima oqaaseqarfigissavarput.

Ikiaroornatumik atornerluinnermi ajornartorsiuteqarnerput ajuusaarnangaartumik meeqqat inuusuttuaqqallu akornanni aamma ajornartorsiutaanera malugiarparput, allaat ikiaroornartumik atornerluisut ukiukilliartornerat oqariartuutigineqartarluni, tamannalu akuersaarneqarsinnaanngilluinnarpoq.

Aanaakkuugutta, angajoqqaajugutta qulakkeerniarsarisarparput kinguaariit pitsaasumik aaallaaveqarlutik ingerlaqqinnissaat. Kinguaannguagulli ikiaroornartumik atornerluisunngoraangata kinguaariit tullinnguuttuut ernumagilertarpagut. Kinguaagut ikiaroornartumik innarlerneqannginnissaat, siusissukkullu atornerluisunngortinnginnissaat qulakkeerniartariaqarparput. Kinguaagut ikiaroornartumik atuilersimasut katsorsartinnissaannik neqeroorfigisariaqarpagut. Maannakkummi katsorsaaviit inersimasunuinnaq atugassiaapput immikkullu meeqqanut inuusuttuaqqanullu tulluarsagaanatik.

Ilisimavarputtaaq misissuinerit takutikkaat meeqqat inuusuttuaqqallu hashimik atui neq aallartaarsimagunikku, qaratsap ineriartornissaanut aammalu eqqarsartaatsimikkut qaangerneqarsinnaanngitsumik innarlerneqarsinnaasartut. Atornerluinerup inuunermi ajornartorsiutinut arlalippaassuarnik aporfeqartitsisarnera takussutissaqarpoq, inuttut ingerlariaqqinissamut killiliisinnaasartumik. Soorlu ilinniarnissamut, suliffeqarnermulluunniit.

Isumaqarpugut meeqqat inuusuttuaqqallu 18-it inorlugit ukiullit piaartumik katsorsarneqarnissaannik neqerooruteqarnissaq pingaaruteqarluinnartuusoq. Siunnersuuteqartoq taperserluinnarparput siunnersuumini, Naalackersuisut

iliuusissamik pilersaarusiornissaannik pimaffigineqarnissaat pingaaruteqarluinnarmat.

Meeqqat inuusuttuaqqallu 18-it inorlugit ukiullit ilaqutaasalu piaartumik iliuuseqarfigineqarnissaat anguneqarnissaa qulakkeerluinnartariaqarpoq. Katsorsaamissamut periusissat suleriaasissallu ersarissut neqeroortigineqarnissaat pisariaqartilluinnarparput.

Meeqqanut inuusuttunullu katsorsaavik takorloorsinnaavarput ilaqutariinnut tulluarsagaasoq. 18-ninimmi ukioqalersimannigitsut suli meeraapput, angajoqqaaminnit allanilluunniit inersimasunit akisussaaffigineqartut. Taamaammat pisariaqarpat angajoqqaat katsorsaanermut peqataalluinnarnissaat pingaartutut isigaarput.

Aamma takorloorsinnaavarput ilinniarfiit, ulloq unnuarlu angerlarsimmaviit meeqqanik inuusuttuaqqanillu tigumiaminnik katsorsaanermut pisariitsumik innersuussisarsinnaanissaat, katsorsaavimmiillu siunnersorluarneqartarnissaat kissaatigissallutigu.

Meerartatta inuusuttortattalu erligeqisatta ikiaroonartumut annaannginnissaat aqqutit tamaasa atorlugit anguniartariaqarparput, allaat meeqqanut inuusuttunullu atonerluilersimasunut katsorsaaviliornikkut.

Taamatut naatsumik oqaaseqarluta siunnersuut taperserlugu Peqqissutsimut Ilaqutariinermullu ataatsimiisitaliamut suliarisassanngorlugu ingerlateqqipparput.

Qujanaq